

四庫全書

集部

欽定四庫全書

古穰集卷十九

明 李賢 撰

行狀

先祖迪功郎雲南江川縣丞致仕贈資善大夫  
吏部尚書兼翰林院學士李公行狀

公諱威字希原其先古薊人唐時有官於鄧者見其山  
水清秀地腴民淳遂土著焉子孫蕃衍宋光宗時有昆

第四十八人計三百餘口同爨不分旌為義門歿後子孫用遺命合塋一丘今墓木成林者十餘里號長樂林云曾祖諱成祖諱義卿父諱寬甫俱不仕以行義為鄉里表率族兄諱恭敏仕元為陝西行中書省平章政事以才能為時聞人至正十四年丙戌公年十四從本郡毛葫蘆義兵二十五年授金字銀牌毛葫蘆千戶三十年至陝西授乾州總帥洪武初棄官歸家十一年有司以才能辟授福建興化府莆田縣典史尋轉山西平

陽府翼城縣任滿以績最陞雲南澂江府江川縣丞乃  
慨然曰吾聞志士不擇地而行道化民成俗此其時乎  
至邑誠心佐令專事德教而民無梗化者有遺愛在民  
三十一年以年老乞致仕還家壽七十有八以疾終公  
罷字魁梧天資嚴重遇事敢為未嘗苟合所至人稱長  
者嘗曰士生斯世貴乎濟人聖賢云仁者愛人四字吾  
未嘗一時不留心也在江川時民有詣藩司告商衆欲  
為亂布政張統責逮捕之令簿咸失措公以為安知非

詐潛往察之無狀明日自詣統白乃止商以故得安凡事類此統異之曰他日舉用必此人也未幾統為吏部尚書會乞致仕竟不能留居家儼然非衣冠不臨子弟鄉之章縫牧校咸禮於家相與考德問業改行者什九民有訟者胥質焉一言愧服每羨陳仲弓王彥方之為人曰士大夫居鄉如二子斯無憾矣尤好施予民有匱乏者輒恤之不望報族中仰給者十餘家子弟俱事產業嘗曰良家所事耕與讀耳專耕則俗專讀則窘乃擇

諸孫之秀者為郡庠弟子員用是家聲不墜公生於元至正元年癸酉十二月二十二日卒于明永樂八年庚寅九月十九日正統以來以孫賢貴累贈資善大夫吏部尚書兼翰林院學士娶楊氏繼孟氏累贈夫人側室張氏高氏桑氏生子男三人長曰善次曰良次曰昇累封吏部右侍郎加封如公官女二人長適鄧州守禦所百戶丁銳次適郡庠生輩智族子曰旺信陽衛指揮僉事孫男十人長曰孟芳湖廣布政司右叅議次曰仲芳

次曰賢少保吏部尚書兼華蓋殿大學士次曰季芳次  
曰謙次曰興次曰隆次曰讓南京貴州道監察御史幼  
未名者二孫女八人正統四年某月某日塋于長樂林  
之陽從先兆也謹狀

先伯行狀

先伯諱良行二自幼為祖考妣鍾愛方先祖驅馳於仕  
路間弗遑家事惟先伯與長伯在家俱方弱冠能自卓  
立經營產業以故弗克隨侍然先祖得專意仕進勤其

職務抑以初無家事累心故也當是之時隨侍者惟家父一人自福建之山西自山西之雲南跋涉雖勞而無鄉園之思亦以先伯能膺幹蠱之任使闔家數十口不乖不離怡然和順而無戚戚囂囂之惱焉洎先祖以引年致仕北歸產業饒裕用是得享優游之福十有餘年先伯之力也及先祖辭世先伯哀毀過禮凡百用情附身附棺之事必誠必信已而兄弟三人者議同爨誓不析居然家之別墅鼎峙南北遂各守其一得以專力課



業惟先伯於農務最精暇則督行負販不使生理或輟其心力之勞視昆季十多四五而衣食時或不給豈非命歟先伯為人樸實儉素醇謹無偽嘗自嘆曰吾竭力生涯不敢荒怠而資用缺然豈非儒者所謂耕也餒在其中者哉吾又聞抱甕灌田之老惡其用機者然則吾亦無愧於斯老矣夫鄉人無遠近老少咸推為長者方六旬餘忽病僂遂隆然伏行有類橐駝即古所謂鮐背者人以為壽徵七旬後其伏尤甚凡鄉人歲時慶會必

以肩輿迎之已而送之不然莫能自至至則怡然正席  
酌必盡重賓客雖衆而主人之權必係於此蓋其齒德  
有足致人之愛慕者予自獲仕于朝始能以俸帛什一  
為助歲恒繼之正統乙丑予以內艱還家居憂得頻會  
焉會則或留浹辰必盡天倫之樂而去彼時猶能自健  
也景泰癸酉予奉使西蜀道經故里明日即迎至得奉  
寢膳十有五日盖已衰倦無復自健意匆匆拜別星未  
兩終遂一疾不起訃音忽至痛不能興第恨絆於職守

弗克匍匐祭寔以盡猶子之情悵望家山徒增感悼而已先伯生于洪武丁巳某月某日卒于景泰甲戌某月某日享年七十有八娶桑氏生男二人女二人今惟季女適湯氏者存繼湯氏生男四人女一人俱成立有配子懼先伯行實之泯敬述其槩以藏庶後世子孫有考焉

中順大夫安慶知府周公行狀

公諱濟字大亨世家洛陽曾大父諱文質大父諱誠之

俱隱德不仕父諱禮以不羈之才遠涉江湖間公既冠  
永樂丁亥春自入郡庠為弟子員博學強記因讀論語  
至父母在不遠遊章味定省曠而音問踈之語愀然不  
樂曰父在數千里之外幾星周矣若之何而不往省乎  
即棄學徒步以往再越月抵閩適邁疾已危一見公遂  
愈乃奉以歸復入學曰方寸定矣於是刻苦不知寒暑  
者累年遂領河南甲午鄉薦赴太學學業大進尋歷事  
烏臺會蠡縣豪民毆人至死賂同行証一老人已問未

決公訊其情有疑既二日乃得豪民狀遂出老人闔院  
異之聞於都堂自後獄有疑必委公無不得其情適有  
中官陳姓者宣廟極寵之因有過大怒送院鞫之御史  
嚴繼先輩莫測上意咸避之公曰何以避為立訊成獄  
都御史劉觀由此注意於公會御史缺員以公屬吏部  
補之公以目疾不就宣德戊辰夏遂除江西都司斷事  
初獄有輕重惟都指揮是決公曰此吾職也彼何與焉  
雖盛怒執愈堅既久服其公反加禮呼為大兄藩臬鉅

公由是皆重之癸亥春以父喪去位居家不作佛事一  
從文公家禮鄉人咎之謝曰僕儒者流安敢從佛因嘆  
曰昔程子之賢亦不能化况我輩乎服闋調湖廣都司  
正統改元秋用當道者薦拜監察御史立朝有蹇諤風  
士大夫為之改觀二年冬鎮大同中官郭姓者以豪橫  
僭度聞於朝廷勅一御史往廉之先往者不得其情復  
以公往乃微行代負芻者入其宅盡其違法狀朝廷嘉  
之明年春御史出巡宣府者以邊情劇不能處分遂自

經欲遣能者咸曰非公不可公既至邊將為之斂迹邊務一清四年夏以母喪還家躬脩塋域見艮方多磚公曰此必古者不封之墓即掩之因增土數尺是夜夢一老人衣冠甚偉揖謝曰感公脩吾宅問其名曰乖崖也既覺悟曰乖崖乃張詠之號已而考之實塋其地公之誠能感鬼神如此七年春服除復受命往巡西蜀威州土官董敏王允讐殺累年不解勢愈大朝廷勅公率方鎮兵數千至其境公曰朝廷本意欲安之撫之不服然

後加兵未晚也吾不忍其肝腦塗地乃令人賫榜於各寨宣布朝廷恩威且曰從撫者即無罪允讀其榜沉思之書囙字於榜尾令持還衆不解其意公曰此非難見囙者誘禽鳥之媒也意謂誘而殺之耳復釋此意示以誠信允大驚曰非凡御史也即投服以馬數十令子弟入貢贖罪敏亦愧服一方遂安朝廷嘉勞之十年秋復巡鳳陽逢歲歉民多窘於食公嘆曰此地民饑我饑之也輒開倉賑之然後聞於朝有司危之公曰以此得罪



甘心焉若俟報何帝穿井以沃焦釜民賴全活者數十萬事竣會安慶以人民饑食流離聞且報無賢守之故於是大臣咸推公十一年夏出守安慶三歲至被象之明日召闔郡父老問其故皆流涕曰此處三歲不熟矣以子女易食滿載而南者無虛日公即分命止其舟借漕運糧以濟之子女得存者不下萬餘連章懇陳歲荒民流之故復乞停稅朝廷俱從之首訪余忠宣公祠已毀矣公嘆曰余公昔鎮安慶保孤城於七年之久仗義

死節有功於名教今乃無祠非缺典乎遂與僚屬各捐俸立祠民之樂從者甚衆俗尚奢親沒不塋者數百家女聘未歸者千餘家公乃出令示期違者罰之貧者助之不兩月無留焉閩中寇起天下騷動安慶貧民亦欲乘勢乃聚衆強取富民粟富民以盜訟於公公曰此非盜也乃貧耳即碎其狀曉於貧民曰得其穀者報以數吾代償之貧民聞之感愧遂解散暇則集職行錄以驗為政之得失擲垢爬痒務蘇其困民賴之如父母焉工

部尚書周公忱巡撫諸郡獨慮安慶歲必數至親為綜理自公下車之後曰吾無安慶之憂矣在任三年以疾卒六縣之民為之罷市巷哭若親喪願扶柩至洛陽者數十人視古之循吏亦何愧焉公為人謙恭不立崖岸外和內剛事上接下交友無不得其懽心風流醞籍善記子籍凡事必究其出處雖隱僻事亦精到喜清談遇知己對酒達旦不寐人論文或忽公詰之即窘復為開之識量過人能用其智真所謂豪傑之士也生於洪武

丙寅卒於正統己巳壽六十有四配封氏子一人曰端儀用有司舉為陝西狄道縣丞女二人長端貞歸于賢次端潔嫁國子監學錄王讓景泰改元端儀塋公於邛山駱駝峯之陽從先兆也謹狀

傳

丁三老傳

三老姓丁氏名廣居鄧州天資淳篤好施予初立別墅於城南三十餘里率子弟事農數年資用饒足有兄析

居城中而貧三老夏供麥秋供米歲以為常時具酒殽  
躬詣兄所盡歡而回四時製衣必先其兄寒則撫兄背  
曰衣得無薄乎兄壽高潛命其子持白金往湖南易棺  
木製而藏之兄卒悉力喪事哀戚之情同於父母兄有  
數子析居已而窘乏者過半三老一一賙之既與之粟  
帛足一歲用復與牛種使自為來歲計不能者又賙之  
雖數無衰意子姪後自慚忍乏不以告三老察知之怒  
其不告復賙之是後子姪俱能自力於衣食所居之鄉

有婚不能娶者即令具酒食代為請助命置薄於席前  
書助物若干喪不能葬者亦然當其請助以與為榮稍  
弗良者置之有愧而求與者一鄉榮辱之權歸焉友人  
黃六居城市窘於食往造之三老大喜曰故人何疎也  
開樽罷未敢言三老使子弟探知之曰聞君缺食何不  
即言隨載糧一車送至其家自後使人察之稍窘即賙  
不待其告也有孔景者亦居城市貧無所營三老請與  
謀曰吾宅良方古宅也君有意為隣乎景喜過望三老

即命子壻築牆造屋期月而完景挈家以居又慮其不能力田復與子壻約每歲除禾在田者若干畝與之俱令人代為入園而後已居十數年景卒喪葬之費一力承之顧其妻子過於景在時未幾景妻為親遷於城市每歲供食為定約焉凡僧道來乞者亦必厚與之不留餘積常急用銀數錢探其藏不及一錢門對一池魚不滿尺不取見牧童獲飛禽走獸雛子者必放之家人嘗有過既痛決而復哭之怒其弗率而憐其受笞也接人

謙恭溫雅對人子言則譽其父之善對人弟言則譽其兄之善已雖善盖一鄉未嘗一言自矜恂恂然可敬可愛也鄉之耆老皆慕其義取法焉有為不善者率感化或遠去尤敬禮儒者學正姜志達重其為人數往會焉三老歲供時物如執弟子禮無事不詣城郭州所官僚尤敬愛凡鄉飲會宴敦請則一至見則翼翼然卑下小心不問不敢對宴畢即日而還偶得風疾甚危鄉人一時驚相報至者數百人咸迫切哀禱於神明日遂愈壽



至七十三而終嗟夫三老之行如此回視古之陳仲弓王彥方亦孰知其先後哉予親見其人故為之立傳

向孝義傳

向侃字希顏世家廬之巢縣宋元時宗族甚衆鄉人號其所居曰向家團希顏篤於孝親左右就養凡晨昏之節一毫不爽尤先意承志喻父母於道日夕惴惴惟恐人之及親也洎父允中沒毀形哀痛幾於滅性喪事一遵朱氏禮居憂三年事無鉅細一一用情親族父老莫

不嘆異曰生長以來見喪親者未有若是詳且盡也從此不與宴樂之會每歲時祭享輒痛哭無異初喪時娶趙氏尋以疾卒生一子甫六歲母湯氏臨終謂希顏曰汝若再娶務恤吾孫希顏泣受教遂終身不復娶君子曰孝子義夫兼有之者其惟向君乎雖然孝者百行之本而義者孝之推也希顏兄弟五人同居共食怡然和敬至於垂白無間言非孝而能之乎奉使浙江同事者十有七人一人忽嬰疫癘衆皆畏避希顏惻然曰具湯

藥疾遂愈曾謂非孝之推乎希顏為太學生大司成陳敬宗先生深器重之筮仕靜寧判官廉正慈祥父老舉以手加額曰吾輩生長田野迫於衰暮今日始見慈父嘗董運邊儲夜宿輓車傍與役夫同甘苦人人感激當道者薦擢監察御史冢宰王公知其才行復薦擢澂江知府操履始終不渝其蒞官敬矣可不謂之孝乎希顏嘗推恩及親有勅命之褒未老懇乞致仕優游田里壽七十有三全歸以終其為孝不既大乎希顏從子曰恩

為諸生念其世父孝義恐至漂沒乃不遠數千里請于太史氏然則若恩者亦可謂孝子不匱永錫爾類者乎

黃氏母子賢孝傳

黃氏名文父鉉江西新喻人永樂癸巳徙河間之任邱娶孫氏生文甫一歲商於南陽之鄧州守禦所百戶李興見鉉文雅以女妻之未幾歸任邱李氏與孫氏相戾間達於興興遣人取其女還鉉亦隨往時孫氏年二十有四文方四歲鉉別後音問不通孫氏與文母子二人

零丁孤苦人不能堪而孫氏奮志成家勤力紡績夜以繼日以供力役之征周衣食之費撫育其子年及成童謂所親曰吾聞子弟讀書可以起家今吾備嘗艱辛幸有此子若遣入庠序以勗其成天其或者憐吾志乎所親曰此意固善第念爾一子之外更無紀綱之僕子若在官凡百費用尤倍於昔吾恐爾之艱辛未艾也孫乃愀然泣下曰吾已慮之熟矣顧處子之計莫良於此雖倍艱辛安敢辭同編之人聞之勃然怒曰吾代爾子力

役久矣今幸其長不吾累焉而又脫之可乎雖懇情乞  
惠拒之益堅孫氏憂鬱食不下嚥已而會所親達其情  
于有司始獲入庠孫氏且喜且懼愈極力生業勵子進  
學而凡從師親友之需未嘗少乏文亦感激遵母之訓  
潛心經史但自幼父去嘗問母曰吾父安在母曰汝父  
世家江西為商河南吾亦不知其所棲矣於是母子相  
顧潜然出涕以悲正統己巳文以成材貢入太學會天  
下士子講習一日言及其父不知所在有同舍生王綱

者鄧州人聞其父名曰吾州百戶李興有壻即此名也  
非汝父乎文因思母所云大喜曰是也景泰初以謁告  
歸省至家即白於母徑詣鄧州訪父果在內鄉板橋鉉  
離其子已三十四年矣一見痛絕方蘇親屬會晤悲喜  
交集留數月不能同行文復辭父入監天順改元夏吏  
部掄才以文為兗州府通判乃奉母抵任視篆後即遣  
人迎父就祿以養父時年八十有五憚於遠涉再迎不  
起至三母曰汝之孝心盡矣彼有所戀不可再迎文悲

思不已曰吾父不來吾即棄官而往闔府官僚咸跪請  
其母母亦悲感而許之一時見者無不沾襟乃以安車  
迎至鉉離孫氏已四十四年矣妻子父母始得會合以  
遂天倫之樂嗟夫黃氏母子其賢孝矣哉向非孫氏之  
賢其子未必成立以有今日非文之孝其父未必會合  
以獲祿養遂使零丁孤苦之室變為團欒歡慶之堂予  
親見其事因為作傳以告於來世



古穰集卷十九

欽定四庫全書

古穰集卷二十

明 李賢 撰

祭文

受誥命告先祖文

維景泰二年歲次辛未月日孝曾孫吏部文選清吏司  
郎中賢敢昭告於三代先祖考妣尊靈恭惟祖宗積德  
之厚澤及後人賢仰承餘庇竊祿於朝祇懼戰兢不敢

荒怠茲奉天恩頒賜制命階奉政大夫父母妻室同荷  
寵榮嗚呼根之固者枝必茂源之深者流必遠今日之  
慶豈無自而然哉膺斯曠典追慕何勝謹以三牲酒菓  
用伸虔告

焚黃告先妣文

維景泰二年歲次辛未月日孝男賢敢昭告於先妣之  
靈男奉承慈訓竊位於朝茲荷天恩頒賜制命追贈先  
妣為宜人謹用膳黃焚於影堂竊惟男自幼多厄長育

最難我先妣軫念之懷備極憂懼幸而成立縻於仕途  
弗克就養膝下顧茲罔極之恩方將圖報於萬一豈意  
遽違祿養況今俸入稍厚不及生前言之痛心豈勝感  
慕嗚呼泰山為礪磨盡有期此恨綿綿何有窮已謹以  
三牲酒菓用伸虔告伏惟尚享

焚黃告亡妻文

維年月日夫賢以三牲酒菓祭於黃氏之靈茲荷天恩  
錫爾制命贈為宜人念爾昔者配予方冀成家

闕

一

星命遽云天此雖定數情何能為服此寵榮少慰幽魄  
爾其享之

祭陳僉憲文

象山之秀鄞水之清鍾靈孕奇惟公以生公之生也粹  
然其質不昧而明不妄而實潛心稽古易書春秋得聖  
之奧與賢者遊蚤掇巍科擢任御史豸冠戢戢振揚風  
紀如唐子方孤忠自將如趙鐵面凜乎風霜簡任帝心  
十年清苦超陞臬司往臨中土公惟初志益勵不渝方

伯連帥孰不憚予公出巡行滿車甘雨一道澄清閭閻  
却暑報最天官厥績茂焉乃增祿秩持憲蜀川蜀人仰  
之咸曰我公期公福我溘然告終嗚呼哀哉予昔在學  
公來按試獨霽霜威戒勉諄至以予試文徧示諸庠不  
肖之名愧公以彰於時賓興值公監試為某嫌也乃辭  
厥事幸而中焉副公盛心公豈有私顧予何任猥以匪  
才辱公之好訃音忽聞豈勝哀悼義當往弔羈於官守  
千里緘辭附以尊酒追思儀容潸然涕滂公其有知鑒

此衷腸

祭尹貞外文

嗚呼尹君廷佐年方四十有八矣忽一疾而竟亡士林相顧愕然無不為之痛傷造物者操數於冥冥之中何獨斯人之不常謂善者福謂仁者壽今乃大謬不然豈天道之乖張嗚呼廷佐兢兢小心循循雅飭司銓衡十有餘年而持已之恭未嘗一日而怠忘威儀棣棣不可選也如驥之德如玉之良豈獨僚友親而愛之在朝搢

紳孰不願交曰氣味之深長予之不肖昔忝同事而朝夕相從世俗之態曾不見其毫銖惟仁禮存心所以愛人敬人之道愈久而彌彰名位方殷如川之至誰謂半世而止沾予襟之浪浪屬續之際思予一見而永訣痛知己之難留惟附命於穹蒼陳辭寫哀薄奠一觴靈爽如存將必有感而來嘗

焚黃告先祠文

維景泰六年歲次乙亥某月某日孝孫男吏部右侍郎



賢敢昭告於顯祖考妣顯妣尊靈曰仰荷尊靈積德深厚被我後裔榮仕於朝茲者祇奉制命贈顯祖考江川府君為通議大夫吏部右侍郎顯祖妣楊氏孟氏顯妣葉氏及亡室黃氏皆為淑人恭惟朝廷推仁廣恩施及先世恪奉制命忻悅曷勝顧惟賢拘於官守弗克躬詣鄉園敬伸祭告瞻望桑梓感慕益增謹用謄黃并製冠服齋至祠墓恭行燎禮今以清酌庶羞於京邸行祠先此伸告

代家父告焚黃文

維景泰六年歲次乙亥某月某日孝男封吏部右侍郎  
昇敢昭告於考妣尊靈有孫曰賢仰荷考妣積德垂慶  
獲仕於朝叨膺祿位於斯有年茲者仰荷皇上帝恩特  
賜誥命贈先考江川府君為通議大夫吏部右侍郎先  
妣楊氏孟氏為淑人及亡室葉氏并孫亡婦黃氏亦為  
淑人祇承恩命忻忭無涯念孫遠隔鄉園羈於官守弗  
克親詣祠墓祭告恭依制命謄此黃文并製冠服專人

齋回男敬潔牲醴庶羞特伸燎告伏惟尊靈服此休命  
敷佑小孫竟展忠誠用昭令美我先人亦倍有光焉謹  
告

新居祭五祀文

維天順三年十二月己酉朔越十日戊午吏部尚書兼  
翰林院學士李賢敢昭告於司門之神司竈之神司中  
雷之神司戶之神司井之神曰五行之運發育萬物惟  
神之靈有家當祀賢叨荷聖恩徙茲新宅神各司職尚

賴爾庥安我人口蕃我畜殖其永無愆以保終吉謹以  
牲醴用伸虔祭

祭伯母楊氏文

嗚呼伯母自為先伯繼室殆五十年於茲矣勤於治家  
勞於紡績儉以自奉恒憂門戶之衰和以待人尤篤宗  
姻之義於婦道則克脩於母儀則能盡子女各底於成  
立福壽已臻於隆長老而孀居不渝初志沒應無憾瞑  
目泉臺訃音忽聞心盡傷而出涕緘辭遙奠靈昭鑒而

來嘗嗚呼哀哉

銘

存養銘

天之生人道在其心神明之舍無迹可尋方其靜時具此太極萬理森焉洞然以寂君子於此敬以持之須臾之際不使或離不覩不聞提撕警覺聳然惺惺防閑儼恪天下大本未發之中能不忽焉感而遂通嗟予之資既昏且駁存養之功亦曰願學從事於斯動省厥幾庶

幾終身無或自欺

省察銘

幽暗之中細微之事著見明顯亦何其至所以君子惟  
慎其獨人欲將萌絕之宜速於動之幾審之惟精毫釐  
有差道不吾凝奈何為學紛紛鹵莽人不見聞遂失其  
養潛伏之詩我則味之內省不疚於心自愧喫緊工夫  
莫此為要嗟予小子敢違斯教於以作聖於以致和兢  
兢其畏矢心靡他

克己銘

一心之微理欲交戰所以君子力為之辨惟理惟欲能  
判於心務去其欲勿使或侵惟欲之端奚翅一辭曰邪  
曰偏曰非曰私或有一焉理即亡矣形雖為人心則物  
只志士於斯奮然不回遇敵而前安問其誰惟茲大勇  
古有顏氏顏何人哉學之則至顧予之鄙匪曰大言斯  
復其初無忝於天

改過銘

人非生知孰能無過過而能改斯不為懦志不可愾慝  
不可留改之勿憚勇於自脩學問之道惟此為急苟或  
畏難闕以集所以君子知過不容速以改之惟善是  
從於以徙義於以崇德歎悔不存我心則憚如湯之聖  
如回之賢不吝不二莫之或先下逮仲由聞過則喜百  
世為師在此而已如予不肖敢忽其要希聖希賢弗棄  
弗暴

主靜銘



學問之道靜為第一心靜則虛不靜則窒惟其靜焉湛然以寧如水之止如衡之平豈若釋氏曰禪而定收此放心隨事而應苟不靜焉紛紜膠轕蔽交於前莫之能遏於以應事齟齬鶻突茫然無歸方寸恍惚惟聖立極乃主於斯惟賢致遠亦曰在茲由是持敬乃為善學非同槁木有見其卓先師訓戒我則佩之專其精神庶無外馳

主敬銘

惟人之生得氣之正理亦具焉斯謂之性盡性曰心虛  
靈知覺苟不敬焉昏亂交錯為聖為賢為愚為頑究其  
所由敬否之間所以為學非敬則肆成始成終咸由於  
是偉哉先儒提敬於前用力之方開示惓惓主一無適  
整齊嚴肅曰常惺惺曰時檢束惕然悚然薄冰深淵表  
裏動靜無或間焉潰川隄防奔馬銜轡須臾怠忽眾欲  
交熾凡我後學尚鑒於茲作聖階梯舍是何為參前倚  
衡惟敬是主宜效仲弓請事斯語

行恕銘

為學工夫惟恕為要終身行之可以至道聖門穎悟子貢為先夫子告之三以恕焉推以及人取譬於已求仁之方在此而已斯恕之公不可無忠體用雖殊形影則同曰愛曰惡曰治曰責彼我之間分顧各得亞聖有言強恕而行服此成訓誓勿荒寧

輔漢卿所編朱子讀書法綱領凡六條前後二集總十有四條已刊於集慶學中後有番易齊

熙又更易次第著其說於每條之下今雖載於  
真西山記中又殘缺大半茲欲揭六條於家塾  
以警子弟於是每條為銘數句云

居敬持志

讀書之本在於一心至虛至靈神妙莫尋心能不放何  
術可仗居敬持志無以復尚敬或不居志或不持飛揚  
馳騖物慾是隨嚴恭寅畏心入腔內讀書觀理庶幾不  
昧

循序漸進

讀書之法貴乎有序漸進為功不可急遽小學大學論  
孟中庸六經子史次第求通量力所至立此程課字訓  
句旨勿得放過苟為不然貪後忽前凌躡疎易是誰之  
愆

熟讀精思

書必熟讀不厭反覆在口成誦千百未足精而思之卻  
立徐行如攻堅木如理亂繩意得於心常使浹洽燕閒

之中玩味勿雜心與理會血脈貫通持此不懈作聖之功

虛心涵泳

士之讀書貴乎有則務廣貪多終無所獲虛心靜慮涵泳從容欲速不達進銳無功所以君子深造自得意緒安閑勿急勿迫心潛於一久而不移顧予所樂知者其誰

切已體察

體察之功貴乎切已矯輕警惰私念或起省身如曾奚  
翹日三萬物予備一誠勿叅喚醒此心内外交養點檢  
提撕纖毫不爽見微之著過於將萌慎獨自克日進高  
明

著緊用工

為學工夫忙若救火即時向前奮然敢果如饑求食如  
寒求衣嚴立程課不可少違撐船上水急流之中一篙  
放緩退而無功所以君子孳孳不倦競此寸陰務償夙

願

硯銘

嗟爾泓出端溪奈之何精堅之質友陳玄而見虧玄哉  
玄哉其亦孔子所謂損友也君子取友其慎之

筆銘

爾穎之才藉玄而著友道相須古人斯慮進銳之志尚  
宜戒之苟或忽焉銳盡何施

蓋銘



嗟爾高盖以覆為職雖無蒼穹之廣大其於人也有益  
惟雨惟日汝能蔽之第恐狂風忽至而倉卒不能自持  
雖僕隸紛然奔救其不離披也者幾希惟智者早見能  
收於未風之時

床銘

床橫八尺載人之眠於夜也則宜於晝也為愆或曰愆  
者人也床何與焉然則人之愆必有其緣使其晝無斯  
床將必絕人之便庶幾乎終日乾乾

劍銘

寶劍之精龍光上昇其為形也如虹如霆如星之粲如  
霜之清君子佩之鬼神為驚若夫措諸用也剗犀斷鯨  
會須為我獻之明廷天下之人其不肅然以寧

尺銘

惟尺之度因律而作積而累之不失毫末古之神禹以  
身為度地平天成豈無其故若夫大學絜矩之道非爾  
為用亦莫能較由是觀之一尺雖微而有公平正大之

體君子於是乎亶亶

箴

思誠齋箴

有序

焦君秉聰有志於聖賢之學以思誠名齋而請其說於予予何足以發明斯道哉然竊聞之誠之一字只是實理聖賢論之更無餘蘊而思誠又孟子教人用力求誠之要即中庸所謂誠之者人之道也嗟夫天地萬物莫非實理惟聖人不假脩為而自存賢人必待脩為而後

存若夫衆人爲私欲所蔽往往流於妄誕欺詐而實理之在已者昧矣學者能於日用之間一動一靜一言一行必思所以誠之擇善而固執自強而不息則實理復存於我矣古之君子作聖之功惟在於此今焦君獨能以是留意其度越常情遠哉故不鄙而爲之箴

人之有身萬物皆備惟聖存誠絕彼私意賢人而下豈免自欺必由乎學曰惟以思審思明辨乃慎其獨心廣體胖自反而縮是曰自慊氣乃浩然惟誠在已樂莫大焉古葉

之英故家之胄曰焦秉聰裒然其秀立心制行取法聖賢顧此人道思誠惓惓表厥齋居舉目常在擇善固執罔敢或怠俯仰無愧廣大寬平進進不已自明而誠日用彝倫一真無偽仁義根心粹面盎背由中形外表裏不殊斯為盡性聖賢同趨嗟予疎拙敢自棄亦有志焉孜孜不替相彼爾室予以言箴以共勗為蹄為筌

贊

漢三臣贊

蕭何

何與高祖布衣相從入關所得圖書是崇養民致賢卓  
為上計拜信築壇懲彼兒戲不絕糧道恒保關中漢興  
楚滅伊誰之功帝心多疑何亦甚殆善用謀獄猶見  
逮以參代相為國得人勛居第一永矣無倫

曹參

參從高祖始以中涓攻城掠地執銳披堅身數被創志  
不少替陪楚興劉允賴其濟既還假相遂相王肥治用

蓋術民有所依剖符定封居何之亞代何為相功不為  
下何由以見遵之弗違民歌寧一千載有輝

王陵

高祖微時事陵為兄陵聚其黨遂從楚兵洎漢擊楚陵  
乃從漢以母招之母死其難漢定天下陵實佐之究其  
初意封侯故遲及居相府后欲王呂正色直言后意乃  
沮夫何平勃背約阿從人臣之義孰與陵同

自贊

以言乎學無潛心諦玩之功以言乎進無剛毅堅忍之志愧天爵之不脩奈人爵之荐至徒存康濟之心而才單力弱不足以自遂也思引退而弗能將不免於天下後世之譏議惟此心之惓惓何功名之敢覬所願者世道亨嘉而身見唐虞之盛治也

復齋焦先生像贊

觀舒遲之容而有以知其德之裕也覩睟盎之色而有以知其性之具也藹發外之英華存凝遠之風度主師



席而育才之志伸輔宗藩而正義之功著其歸老也扶  
筇容與於水光山色之間其樂道也抱膝吟詠夫鳶飛  
魚躍之趣士林仰出塵之清標後裔挺臨風之玉樹噫  
斯人也誠儒者之高流在吾鄉而獨步者也

封通政司叅議趙公像贊

觀素質而識其意誠觀貌閑而知其心古挺孤松之秀  
於秋巖藹幽蘭之芳於春塢良貴在己不慕乎人爵之  
榮安宅是居宜受夫天錫之祐朱顏白髮衍性養於家

山烏帽緋袍絢龍章於庭宇噫斯人也可謂得至樂於  
天壤而無愧忤於仰俯者邪

賦

禎槐堂賦

監察御史房君子儀洛陽人也其尊甫既構  
堂以居忽有槐生其下已而蓊然暢茂子儀  
亦大顯人以是槐為房氏積慶之兆遂名其  
堂曰禎槐而予為之賦

緊大唐之元勛兮蕃後裔於洛陽覽寰宇之茫茫兮乃  
隸籍乎中央歷千載而昌盛兮惟積累乎陰德念所居  
之靡固兮肆鼎新乎堂宅紛輪奐之壯美兮曰宗族其  
聚於斯羌落成之既吉兮見槐生其萋萋揆木類之攸  
產兮宜遠茂乎山壑獨離羣而自異兮其鍾秀乎旁礪  
思有開之必先兮兆奕葉以流芳異晉公之手植兮信  
房氏之嘉祥乃於是乎封之培之育之以夜氣之息飽  
之以雨露之滋順物性之自然兮隨生意而怡悅抑造

化之眊和兮夫豈待乎提挈將見萌之於青陽長之于  
朱明秀之于白藏固之于玄英拂青雲以森鬱兮矗凌  
空于百尺蕩繁陰以滿庭兮羨喬木之無敵符華盾之  
穎脫兮表英邁於子儀擅五色之雄文兮斑上下其陸  
離魁多士于梁園兮復高第乎金榜快鵬搏之九萬兮  
衝雲霄而直上慨攬轡乎駘駒兮綴我冠以神羊著繡  
衣之煌煌兮肅烏府之堂堂運兔毫于螭首兮邁鵷班  
于青瑣振霜威于闕右兮觀民風乎江左由中敷而外

歷兮偉廟廊之清標矧推恩以榮親兮絢錦勅之封褒  
允禎槐之不誣兮何家聲之大振保令德而無數兮期  
始終而一慎又從而歌曰槐之禎兮房之興兮綿綿子  
孫引勿替兮源源慶澤寧有既兮瞻彼其廬洛城之東  
兮崧高惟嶽惟房之鍾兮

張氏孝節賦

緊唐室之忠義兮衍百世其流芳藹詩禮之雲孫兮實  
系出於南陽曰有女其貞靜兮蚤毓秀於閨房才不較

夫道韞兮德乃符於孟光惟松蘿之託好兮遂和鳴之  
鳳凰擬鶴髮之偕老兮痛所天而遽亡悵幽明之異路  
兮哀鬱悵而莫制捐膏沐以勵節兮指井波而自誓幸  
遺孤之方齒兮殫績紡以撫育覲成立以有後兮慰泉  
下以瞑目豈蒼穹之莫知兮復脩短以難留徒海枯以  
為淚兮曾不覽其增憂念雙親之垂老兮願涓灑以躬  
勤同諸弟以周旋兮侍膝下以欣欣羌素懷之未愜兮  
忽靈椿其凋謝悼三從之俱棄兮崩五內於長夜倚萱

堂以釋抱兮謹奉養而益周嘉難弟以奮庸兮得三釜  
以綢繆驚四時之代序兮忽白日其西暮恨青鳥之不  
返兮望瑤池而迷路慈闈忽云告徂兮心何極夫傷悲  
蹇一身之自苦兮顧重遭夫乖離於方寸以無愧兮允  
孝節而兼全視共姜於前古兮僅能盡夫一偏系曰惟  
孝而節兼之鮮兮孰以上聞昭曠典兮寵命下臨光生  
墟墓兮垂之青史永永無斁兮

哀辭

周是脩先生哀辭

訓江都邑庠周轅持其父是脩先生行狀以  
示予予三復披閱凜然有感遂哀之以辭

嗟先生之節義兮與烈日而爭光凜千載之英風兮實  
可慕而可傷視古人其夷齊兮之死為尤決抑所謂  
求仁而得仁兮乃丈夫之貞烈先生之容吾不得而見  
兮夷考其行而可知身雖永隔於黃泉兮心則暴著而  
無虧使我聞之其感慨兮欲何為而致奠潔生芻之一




東兮盼千里而酹獻嗚呼義重於泰山兮何一命之可  
留彼齟齬之偷生兮其視此寧不為之含羞

秦性初哀辭

秦性初會稽人也以進士擢春官主事予嘗  
接其風采淳然篤厚君子也年未六旬以疾  
卒位不稱德物論惜之予以晚進辱雅愛為  
辭以申其哀焉

若有人兮山之陰  
紉蘭茝兮撫瑤琴  
朝翺遊於藝苑兮

夕弭節乎蘋林御冷風以遐舉兮折仙桂於夜明官南  
宮而少試兮擬雲路以高翔忽委蛻於大塊兮曾不係  
夫毫釐闕魂氣之飛揚兮遣巫陽以招之神返堂室兮  
風蕭蕭形歸宅兮夜寥寥芳名千古而不泯兮紹箕  
裘之有人嗟旅櫬其南旋兮悵執紼以無因慨夫人而  
不可見兮增予懷之隱憂慘鬱悒以獻歎兮睇雲山之  
悠悠



古穰集卷二十

欽定四庫全書

集部

古穰集卷二十一

詳校官編修臣翟槐

中書臣劉源溥覆勘

總校官原任中允臣王燕緒

校對官中書臣李榮

謄錄監生臣陳元熙

欽定四庫全書

古穰集卷二十一

明 李賢 撰

五言古詩

擬古

嗟我少年士其性非不聰明知為人學仍復蹈其蹤纖  
毫未有得孜孜伐其功聖賢苦不出吾道誰相宗

大言人皆有踐之豈不難所以坐終日兢兢不自安緬

惟聖賢學豈徒筆舌間至理瑩方寸外物無能干約之  
於七情驗之於四端何以能若是返之而靜觀

遊學苦不早登科苦不遲雖有聖賢質亦為物所移况  
我中人下寧敢慕不羈苟無殷勤志衆欲以之隨仰愧  
而俯忤於道已相離一善不足稱富貴將何為

白頭吟

古禮重親迎必從父母命是以夫婦間所貴惟其正生  
男願有室生女願有家苟能待媒妁好合寧有涯婦雖

由正道夫猶未可保誰謂私相從一心可偕老嗟哉卓  
文君相如豈負心婦道既有虧何用白頭吟

美人隔秋水

美人隔秋水欲渡無舟航清波泛明月對此空斷腸耿  
耿見牛女河漢在中央誰云七夕會無乃謬且狂託物  
感情興水上雙鴛鴦動止不盈尺物性固其常在人良  
不異云胡各一方寒燈照孤寢淚下沾衣裳

出金陵江口阻潮

匹馬出金陵冠蓋雜途擁日落到江東官舍頗清迥秋  
月當牕明永夜霜氣重孤榻不成眠一鴈度寒隴艤船  
欲渡江潮勢兼天湧須臾波浪平百艣相曳踵嘔啞響  
中流舉目神駭悚安得在周行我命若膠輦

雍熙寺書

維揚逢小春風葉散空宇寂寞寄雍熙悲鄉淚如雨何  
以慰我心燈下援琴撫知音苦未逢芳華為誰吐

人日喜晴



長年到人日晴少而陰多今年到人日天氣何清和一  
世能幾逢懽忭將如何縷金鬢邊垂翦綵庭中羅萱草  
舒芳葉梅萼點翠娥靈辰不易得擘繭邀相過酒酣發  
清狂撫劍歌長歌

呂梁洪遇風

客程過呂梁大風折桅子洪濤衝舟橫一命輕如紙牽  
攀泊崖下相顧戰而泚人生百年間出處不相似老櫓  
卧空山流槎行萬里勞逸何不同分固當如此展席坐

蓬牕須臾風亦止

日

陽精結為日真火空中燃運行有常道晝夜一周天無  
欠亦無餘不與天相聯圍三徑千里其形如彈圓出谷  
入咸池紅光耀八埏從知月與星借此光明鮮云何亦  
見食陰盛月同躔于以象君德但願常昭然

月

月方太陰精形圓質亦清其體本無光日照方能明望

遠翔相隨傍觀虧復盈山河微有影九道分其行左旋  
最為遲閨餘歲方成云何望中食太陽射其形予以象  
后德遜避斯為寧

述古

稽古有嘉言逸欲戒諄諄大聖若重瞳禹益猶互陳阿  
衡佐商嗣風愆竟勿循懇懇周太保旅葬却來賓敬觀  
無逸圖有邦萬世珍夫何事荒怠此道未遑詢飄飄夾  
林賞艷艷閭須春豈有鴟鴞智將同燕雀倫在古垂明

鑑休迷覆車塵支頤顧衷曲期不負儒紳

嗟彼一心微紛紛衆欲併所以古哲人惕然事箴警自  
新若盤銘常使目在炳楹杖與劔矛丹書更肅整稷廟  
鑄金人三緘貴深省式觀魯歌器持盈未堪騁亦有睿  
聖公年耄心愈徹旅賁瞽史徒交戒幸無青顧惟理與  
義涵養見真境心正意亦誠允矣前脩並

看書有感

銓府務益廣或有半日閑乘閑看古書忸怩愧我顏聖

賢今已矣慨然發長嘆紛紛安厚祿寧復思素餐非無  
書萬卷曾不誦伐檀緬惟范文正高名重丘山寥寥千  
載後誰復與之班黽勉效分寸汲汲不憚煩先憂與後  
樂志欲回狂瀾安得似魚水不見遭逢難誰云出望水  
依然在人寰滯畫豈有疾去魯不為牆所願非如此煩  
君聽猗蘭

述土木之難

正統己巳秋敵騎忽寇邊聲息一何急頃刻數十傳當

寧乃震驚奸臣擅其權悍然挾天子六師聽周旋廷臣  
既失措將士俱茫然乘輿不自禦疏留行愈堅豈思帝  
王舉為謀出萬全奸心欲逞威制勝當誰先況彼承平  
久鬪志良已捐戰陣既不習安能事戈鋌秋高朔馬驕  
敵勢方控弦我師雖百里無異羣羝聯土木一以圍裸  
體相摩肩前途盡倒戈甘心喪其元人馬積若山營中  
如沸川微軀不可競頽然在人顛幸能脫鋒鏑萬死復  
相連山深鳥道危一命若絲懸遙遙跼絕頂恨無羽翼

騫水漿不入口喉吻生塵煙筋力既已疲歷險愁攀緣  
崎嶇轉崖壑曾不過微涓縱有梅林想何由見酸涎晝  
夜歷三周山盡始得泉歸來問城郭哭聲上青天當死  
乃不死恍如再生年忽忽過半載悸恙方獲痊敵志益  
奮發深入踐京廛豈無貔貅士莫敢衝其前志滿利已  
得回首齊揮鞭外兵禍中原天意無乃偏國恥未能雪  
寧忍戴貂蟬壯志幾時畢雄腸何日牽經畧到窮髮燕  
然名可鐫邊烽從此息黎庶始安便一洗朔方功萬古

垂青編

簡姜貴憲聞過詩

古人喜聞過信為百世師君子能成德賴友以相規奈  
何今之士諱疾而忌醫訑訑距人諫不善何由知心惟  
恥下問自用不能移甘心守孤陋寡助親亦離若人究  
其見無乃愚且癡念此恒自省觀生驗我為吾友具三  
益顧我實所資但願忘人勢有過忠告之武公臻耄耄  
求戒辭愈卑況予知非歲考祥豈憚疲位高才不稱戰



兢恒自持斷斷無他技盍簪意欲縻小德已出入母俾  
大節虧望君不我棄善行勗我施俯仰無愧怍致此非  
君誰幸免取譏諂豈獨相追隨

題畫

方圖展佳趣二客空山遊峯迴石路轉籟息林壑幽斷  
崖鎖煙蘿陰澗鳴琳球擔頭空翠濕屐齒苔痕留百折  
度崎嶇千尺看飛流殘月墮屏嶂枯松掛猿猴溪雲涼  
帶雨山色淨含秋霜重丹楓落巖深嵐氣浮太行歷危

險羊腸任夷猶蜀道古云難攀緣竟何求遙知飛鳥倦  
疑聞杜鵑愁崔嵬到絕頂高寒透重裘飄然發遐想俯  
景豁吟眸會當逢仙子攜手訪丹丘

七言古詩

金臺惜別

玉河隄上楊花飛玉河隄外客西歸晚色蒼蒼慘別恨  
東風蕩蕩吹征衣昔君從父涼州謫回首家山邈胡越  
塞間驚回旅夢孤杜鵑啼破邊城月邊城月缺復圓月

光常照玉門關對月空教動鄉思西陲萬里何時還翻  
懷親友司封客生長相違重堪惜攜琴命駕上京華聚  
首開懷論疇昔親情契合未云久官舍匆匆又分手煙  
光二月薊城春祖餞一尊燕市酒行旌遙指夕陽西驛  
路青山足品題雨霽函關吟處好雲連秦樹望中迷我  
聞君子擅文武剗有奇謀禦戎虜立志休同燕領流致  
身期與嫖姚伍他年霄漢重相逢當時故舊歡無窮皇  
家金石賜不薄願言壯歲收邊功

題夢萱堂

兒生三歲母即亡母心戀兒魂悲傷兒在童蒙渾不覺  
母魂惻惻時護防日居月諸兒漸長始有知覺動思想  
愀然問爺母不存涕泗潸然心惚恍母有魂兒有身幽  
明無路得相親母向夢中見兒語兒初不識母酸辛覺  
來問爺驚所見兒說形容爺與辨衣裳總是沒時穿音  
容不異存日戀兒知是母頓欲絕五內崩摧淚成血毀  
形便若初喪時饘粥一御哀情切嗟哉衛氏孝且純古

有曾參亦可倫天性由來非矯作風俗如此寧不淳人  
生何幸父母存恬不為養獨何心視此安能不汗惡撫  
卷因成孝子吟

題丘氏節孝傳

丘家姑嫂美且烈遭危赴水情默默捨母棄夫非獲已  
不死必為尤冠得嗚呼此情真可哀悲風為爾從天來  
苔溪之水清見底玉骨沈處無纖埃姑嫂捐生身既潔  
母往投之將共絕兒心蒼惶急救母負之出水聲哽咽

母既蘇兮兒在邊一門孝節良兼全羣光相顧咸驚愕  
棄而去之心茫然世上非無顏色好節義不全何足道  
獨羨丘家姑嫂心堅如金石貴如寶我冠博衣為丈夫  
往往貪生甘就汗若人讀此三節傳面赤汗下空沾膚  
聖人扶世立名教但使斯民存節孝丘氏芳名永不磨  
後脣綿綿宜克肖我忝搢紳儒者流此心常為天下憂  
憂見民風不復古吁嗟丘氏誰能儔

秋夜

秋夜有餘清耿耿不能寐出戶涼意來四野星河墜露  
氣濕衣裳茫茫宇宙長凌空不可得歸來倒書床記書  
已成念波冷湘筠簟撫景役吟魂得句還重練須臾天  
山月一鏡渾無缺坐落半牕明對之心愈潔向來雜慮  
湯潑雪不知東方之既白

喜晴

天昏雨方密悄悄幽牕寂就枕已成夢雨聲猶未息覺  
來氣愈爽風細木葉響紙牕忽已白雲淨月華朗攬衣

開雙扉深院凝清輝吟眸四邊開無限秋色來偃仰東  
方曙林間鳥飛去回首扶桑日正紅歸鴻幾點散晴空  
新秋雨霽人心喜我心亦與人心同

送張尹之江陰

江陰勝景接湖海水國名鄉富魚蟹張侯釋褐綰銅章  
父老欣傳得賢宰秋風潞水片帆輕淮月當空夜正明  
北固雲開楓樹曉翠光亭古山禽鳴襟懷皎皎冰壺潔  
僚寀相從盡相悅百里春風錦製新一簾化雨民冤雪



卓魯芳蹤良可追  
德政行看聖主知  
他時有待徵書至  
還擬承恩向玉墀

聽琴

銀河耿耿月華涼  
有客坐對琴一張  
金徽玉軫聯輝光  
拂髯舉指彈清商  
漆園春夢蝶飛揚  
花底啞啞雙鳳凰  
碧霄嘹唳孤鶴翔  
四壁唧唧鳴寒螿  
鳴咽流泉出澗忙  
萬壑爽籟發笙簧  
古戍悲角曉帶霜  
洞庭秋漲波茫茫  
巴峽驚湍激石礪  
突然鐵騎鳴刀鎗  
長堤柳絮隨顛狂

珠林石鼎沸蘭湯雪花六出紛呈祥平沙鴈落滿江鄉  
喧啾百鳥忽軒昂下流奔急見飛航高峯瀑布千尺強  
雷電交作雨霈霧挺然松竹共蒼蒼壯哉不屈百鍊鋼  
引雛江燕語危檣梧桐飄葉隨銀床幽谷叢蘭自芬芳  
八鸞雲漢聲鏘鏘離騷忠憤志堪傷孤臣孽子意相將  
在陳絕糧興慨慷演易羞里憂思長肅然環珮步巖廊  
闕闕鳩鳥在洲傍觸目感雉飛來雙慟回命短沾衣裳  
英雄盖世歸劍芒三命益恭走循牆聖謨洋洋嘉言彰

虞廷賡歌際明良千載遺音幸不亡  
宣云冰炭置人腸  
棲鸞之桐出嶧陽  
法象天地圖與方  
昔聞孔子學師襄  
杏壇函丈日徜徉  
懋下焦尾聲琅琅  
知音爭似蔡中郎  
正聲感我塵慮忘  
藹然和氣在中央  
煩君為我收錦囊  
來日還銷一瓣香

擣衣篇

擣衣向中宵銀河月色饒  
處處砧聲急家家戍卒遙  
戍卒遙幾千里霜砧續斷聲  
不已展轉孤衾夢未成  
風送

愁聲入人耳，閨情感此淚。雙落明月流輝照，沙漠寒衣寄得到。邊城朔雪苦寒衣，正薄。

公莫舞

公莫舞，公竟舞。龍泉三尺虹光吐，鴻門宴上殺氣高。勇士相看勢如虎，赤帝龍顏不可傷。何用屑屑揚雙璫，英雄獨學萬人敵。豈知歷數歸真王，筵前舞罷將軍醉。玉斗聲中霸圖碎，不須約誓界鴻溝。江東父老難重會。

城上烏

城上烏啼月將落城外秋風起寥廓烏聲啼罷露華晞  
草樹蒼涼曙光薄都門車馬集如雲離筵勸酒何殷勤  
酒闌人去棹歌發明日烏啼何處聞

獨不見

獨不見佳人面二八美如花嬌態人爭羨又不見佳人  
老鬢邊白髮垂委棄如秋草世間萬事同此輩興衰得  
喪真相類古來達人每洞觀無辱無榮亦無悔

行路難

行路難難更苦孤影飄飄無定所關河迢遞渺天涯長  
風吹夢歸鄉土亂石灘中一葉舟江心白浪風颼颼劍  
閣窪巍連鳥道縈紆屈心煩愁行路難難更險歲月  
無情何冉冉山頭夕照樹千行天外秋光鴻數點對景  
增離憂莫作汗漫遊百樣艱辛在行路不如高卧藏林  
丘

送俞侍郎還家養疾

明良相逢海宇清甘盤舊學功非輕夙資啓沃不可釋

聖躬有賴增高明潛邸師臣已無幾眷注時時荷殊禮  
忠言正論立朝端帝德光輝日興起如何微恙苦相纏  
動履艱辛淹歲年宸衷軫念醫殫術獨坐經幃徒慨然  
封章懇乞還鄉里寵賚頻繁情不已優游適意謾珍調  
平安早報天顏喜片帆高掛上京船鵬翮重看奮九天  
保傳虛席待耆德相期事業光無前我忝同寅致私願  
臨別不勝情繾綣作歌相贈寫離懷目送飛鴻去如箭

題卧龍圖

漢家神器風波舟奸雄環顧涎欲流斯時誰有匡扶具  
南陽嘉遜阿衡傳帝室之胄何英偉草廬三顧驚神鬼  
幡然感激釋耕耘一旦君臣若魚水鼎分畢竟不能休  
務償初志復神州永安遺恨抱終古出師二表殫嘉猷  
錦水祠堂宛如故劍閣荒蕪流馬路七擒南徼讐天威  
八陣夔城訝神護營中星隕渭濱秋五丈原頭殺氣收  
歸櫬猶能走仲達運移漢祚終難留英雄千載空惆悵  
商周人物能多讓世間成敗不足憑卧龍遺址人爭訪



送戶部尚書沈公致仕

君不見文富二公當耄耋起復入朝人共悅進退從容  
大節完千載令人羨英傑又不見廣受二疏歸故鄉冠  
蓋如雲擁道傍道傍觀者咸嘆息芳名百世猶輝光後  
來誰可繼前躅今喜司徒更知足再入朝行三載餘浩  
然歸志如鴻鵠鶴髮童顏近八旬休官高趣寓鱸蓴籬  
邊秋興黃花發林下春遊翠竹新天壤之間樂誰比蘭  
玉盈庭歡不已水光山色獨扶筇月白風清隨泛蟻物

外緇巾返自然太平人世樂天年江鄉容與不知老一  
任人稱地上仙

蘆溝曉月

此下四首皆  
代言之作

金鷄唱徹扶桑曉殘月娟娟掛林杪長河斜抱鳳池西  
流彩遙連碧波香橫橋遠亘如游龍明珠影落長河中  
桂魄千層琥珀瑩蟾光萬頃玻璃同霜葉飄飄綴馬鬣  
沙河閃爍黃金屑蘆荻聲乾風力寒煙霏繞上銀河滅  
往年幾暇曾一臨碧波渺渺蘆花深千官振轡發歸騎

月華猶在西山岑

西山霽雪

太行西來幾千里突兀連峯半天起朔風吹雨凝作花  
玉龍鹽虎相偎倚嫩寒澄霽朝暾紅千峯萬峯如發蒙  
瑤華散盡錦屏列露出朶朶金芙蓉茲山見說多奇秀  
况復清明景偏茂日射松梢翠欲流雲開石竇冰成溜  
捲簾坐對情何濃預為吾民歌歲豐瑞麥連雲先有兆  
遺蝗入地潛深蹤

薊門煙樹

薊門近與都城通，佳氣葱葱一望中。  
朝煙暮煙自漠漠，遠樹近樹皆濛濛。  
居民樂土今百載，閭閻相望春長在。  
榆柳分行似幙張，桑麻遍野如雲靄。  
紅稀綠暗鳥聲和，往來車馬肩相摩。  
酒館紛紛笑語集，旗亭渺渺離情多。  
都市樓臺迷遠近，殊方賓貢無停運。  
須知此地異尋常，會教永作韶華鎮。

南園秋風

南郊八月天氣清園中萬木皆秋聲靈臺靈沼足蕭爽  
似遊閬苑登蓬瀛長堤迤邐疎楊裊十里芙蓉香不了  
翠栢陰搖輦路涼碧梧影動行宮曉廩庾叻堆兔肥  
鷗鷺浮沈鴻鴈飛蘭菊總芳時可樂稻粱正熟農無饑  
時哉遊豫民心喜緬想周文可同軌惜哉漢武縱高歌  
不知耕斂真徒耳

五言律詩

次泐李潭雜詠

白蓮沼

方鏡無何有亭亭數白蓮  
漱芳憐後輩遺愛憶前賢  
築土為高岸臨流引細泉  
最堪秋夜靜花月兩嬋娟

深居

避世尋幽隱山行十二峯  
茅簷翠竹合石逕碧苔封  
溪漲一川雨林深千尺松  
遙聞漁父唱未得一相逢

漁隱

晦迹知何事生涯一棹中  
歌聲聞夜月笛韻和秋風  
有

意同歸蠹無心作兆熊達人皆遁世吾道幾時隆

入澗有作

谷裏誰來往林深一徑通猿啼常對月虎嘯自生風  
霧重溪流暗霜濃葉落紅何時歸此澗漁舫任西東

朝東

曉院竹風清珠簾捲畫楹薄雲收暑氣疎雨帶鐘聲  
棋勝還經慮詩成可細評年年長此日聊復過平生

夜雪

瑞雪紛紛落殘燈半夜餘獨憐為客日重看古人書夢  
覺憂還集詩成樂自如遙思乘興客風細片帆舒

題送別圖

送別都門外江山入畫圖東風吹嫩柳南浦接荒蕪驛  
路停青旆離筵餞玉壺一朝千里別相贈有詩無

寄隱居

道人高隱處茅屋傍松蘿犬吠樵夫至車聲長者過春  
風多興趣秋月費吟哦忽覺光陰晚衰顏可奈何



櫟山雨

雨勢到孤峯涼生萬壑松山頭掣紫電雲際掛蒼龍溪  
漲魚爭躍風狂蝶自慵兒童驚虎過門外有行蹤

洞山泉

尋幽來洞口洗耳聽泉聲曉色如苔淨寒流似珮鳴芳  
春無客到深夜有猿驚不敢多時立松風透骨清

故人見過

誰知霄漢客復意到山阿花柳春偏勝風煙秋最多彈

琴得雅趣攜酒費吟哦異日著雙屐還來訪薜蘿

溪漲

連朝疎雨過溪漲欲臨軒  
濤響激松石波流入草原  
潺湲歌樹拔滾滾落花翻  
古渡遊人隔時時看水痕

隴下居

尋幽居隴下山色滿牕前  
覽物知天地觀書對聖賢  
煙凝秦嶺樹雲鎖華峰蓮  
欲賞閑中景還須酒似泉

山水圖

看遍丹青手無如此畫工雲邊千樹合林下一溪通翠  
竹圍茅舍清流遠栢宮便思尋隱處忽見畫溟濛  
天然真景趣畫史信多能傍壁兩枯樹臨流一老僧煙  
光溪上結雲氣嶺頭蒸遙望山中寺孤峯第幾層

過后山

山程渺渺去曉色尚熹微野鶴穿松徑殘花點客衣溪  
魚當鏡躍山鳥近人飛却憶漁郎說桃源果是非

東軒見訪

為謝東軒客多勞到此林臨流青樹合歸路白雲深  
世事非關慮浮榮肯係心江山秋夜靜抱膝一長吟

江風山月堂

風月江山景秋來共寂寥籟生涼氣肅天淨晚煙消  
翠色經朝雨寒聲起暮潮堂前得此會眼界自逍遙

送人之陝西

送子西遊日獨傷南浦春如何關外客去作隴頭人  
異地還思舊他鄉莫厭貧懸知從此隔相見夢中頻

送法師住慈感

故人從此去尊酒莫頻催  
臘雪猶堆嶺春風已放梅  
交情留偈別疎景入詩來  
想到南山寺纔逢柳眼開

題畫

久隔江山景何人寫此圖  
寒流如渭水秋色似成都  
恍聽幽禽語疑聞野鶴呼  
不知煙霧重還有隱居無

南澗

遙觀南澗水山畔噴長虹  
清響孤峯下寒流一竅中  
龍

升千嶂雨虎過湍林風盡日西遊遍扶筇欲向東

三老亭

亭構因三老終朝會此間圍棋消白日酌酒對青山  
野鳥時飛止溪魚自往還不知名利客誰似此生閑

大勝寺集聯句

酌酒坐晴沙新秋景物佳綠苔殘雨霽紅樹夕陽斜  
野老來鋪席高僧自煮茶對吟新月上得意岸烏紗

除夜書懷

使節淹淮甸殘冬謝早春揚州除夜客湍水未歸人歌  
管千家樂琴書旅舍貧鄉懷從此切清淚欲沾巾

寄延綏參戎曹少卿十六韻

豪俊當亨泰雲途早著鞭文章期顯後星鳳覩爭先卿  
秩超遷美戎權委任專嘉謀應出衆偉績貴無前定許  
忠輸國寧論雪上顛种公同妙算范老共高騫有志平  
沙漠無心望酒泉三軍威自振千里寨相連驍騎時分  
陣精兵每控弦旌旗鋪遠塞笳鼓擁中堅帝顧憂全釋

金匱要略卷二十一  
天驕懾自旋橫行閑將畧直上息狼煙漢道宜臻盛兵  
塵不近邊秋防嚴據險生計課屯田障夏規千載安疆  
策萬全中興推獨步歌頌寄長箋

古穰集卷二十一